



Broj: 04-04-4-2261/21

Sarajevo, 9. 9. 2021. godine

**SAOPĆENJE ZA JAVNOST O OBAVLJENOJ REVIZIJI UČINKA
„USPOSTAVLJANJE EFIKASNOG SISTEMA PLANIRANJA I DONOŠENJA STRATEGIJA
FEDERACIJE BOSNE I HERCEGOVINE“**

Ured za reviziju institucija u Federaciji Bosne i Hercegovine proveo je reviziju učinka o temi „Uspostavljanje efikasnog sistema planiranja i donošenja strategija Federacije Bosne i Hercegovine“. **Cilj je bio ispitati jesu li nadležne institucije uspostavile efikasan sistem upravljanja strategijama, te je li osigurano efikasno planiranje i donošenje strategija.**

Rezultati su pokazali da, uprkos velikom značaju i potrebama za razvojnim planiranjem, te obvezama koje proizlaze iz procesa pridruživanja Evropskoj uniji, **efikasan sistem strateškog planiranja u Federaciji BiH još uvijek nije uspostavljen.** Nedostaci regulatornih i organizacijskih pretpostavki za upravljanje strategijama i nedovoljna efikasnost nadležnih institucija imali su za posljedicu dugotrajan i neharmoniziran proces planiranja i donošenja strateških dokumenata.

Utvrđeno je da **nadležne institucije već godinama kasne s uspostavom odgovarajućeg regulatornog okvira potrebnog za efikasno upravljanje strategijama.** Oblast strateškog razvojnog planiranja prvi put je normativno uređena **2017. godine**, kada je donesen **Zakon o razvojnom planiranju i upravljanju razvojem u FBiH.** Međutim, **provedba ovog Zakona i dalje nije osigurana**, jer je primjena uredbi donesenih na osnovu njega dva puta odgođena. Pored toga, Federalno ministarstvo finansija **nije izradilo podzakonski akt kojim je trebalo osigurati povezivanje strateškog planiranja s planiranjem budžeta**, iako je ova obaveza propisana Zakonom. Shodno navedenom, **konstatovano je da će se na stvaranje osnovnih preduslova za provedbu Zakona čekati i duže od pet godina, što ukazuje na neefikasnost nadležnih institucija u ovoj oblasti.**

Institucionalna podrška u procesima izrade strategija nije bila osigurana u posmatranom periodu. Federalni zavod za programiranje razvoja do 2020. godine nije bio uključen u procese izrade sektorskih strategija FBiH, niti je bio proaktivan u uspostavi cjelovitih i pouzdanih evidencija o donesenim strateškim dokumentima i izvještajima o njihovoj implementaciji. Vijeće Federacije, koje je uspostavljeno krajem 2018. godine, shodno Zakonu o razvojnom planiranju i upravljanju razvojem, trebalo je imati savjetodavnu ulogu i davati preporuke o ključnim strateškim prioritetima u FBiH, ali još uvijek nije počelo sa radom. Zbog činjenice da nisu uspostavljene ni odgovarajuće evidencije strateških dokumenata FBiH i nadzor nad strateškim planiranjem federalnih ministarstava, nedostaju sveobuhvatni i pouzdani podaci o tome koje strategije su izrađene, koje su usvojene, a koje nedostaju.

Brojni su primjeri nedovršenih strateških dokumenata FBiH za čiju izradu su utrošeni značajni resursi i vrijeme, ali koji nikada nisu do kraja izrađeni ili doneseni. **Primjera radi, za strategiju iz oblasti razvoja turizma, čija je izrada počela 2007. godine, te za strategiju iz oblasti podrške mladima, čija izrada je počela 2015. godine, utrošena su sredstva u iznosu od 708.265 KM, a nikada nisu donesene.** S druge strane, **doneseni strateški dokumenti međusobno su neujednačeni i neusklađeni, zbog čega je upitna mogućnost njihove efikasne provedbe.**

S obzirom na činjenicu da strateško planiranje predstavlja osnovu razvoja i napretka svih oblasti društvenog djelovanja, Ured za reviziju cijeni da je neophodno unaprijediti predmetnu oblast kako bi se stvorile pretpostavke za ostvarenje društveno-ekonomskih ciljeva i učinkovitije upravljanje javnim novcem.

Izvještaj revizije učinka dostupan je na internet-stranici Ureda za reviziju: www.vrifbih.ba.

